



**POVR CHARLES DE CHEVERRY**  
*Sieur de Saint Michel, defendeur & demandeur en  
 diuerfes instances.*

*Contre Dame Iehanne de Durfort de Duras, veufue de  
 Messire George de Foix, Sieur de Rabat, Tutrice de  
 ses enfans, demanderesse en liquidation de Legitime:  
 Requeste ciuile contre deux Arrests du Parlement de  
 Tolose des 19. Avril & 10. Septembre 1583. & au-  
 tres fins: & defenderesse.*



Q N a representé par vn brief estat, que la Dame de Rabat n'a sceu contredire, & c'est la verité, que l'interest du sieur de Cheuerry en ceste cause n'est pas moindre d'unze à douze mil escus & plus, se manquans qu'il ne soit indemnisé & des-interessé de l'éuiction de la terre de Mont-clar, pour laquelle le Conseil par son Arrest du 26. Septembre 1600. luy a reserué son recours sur la legitime de Messire Paul de Foix, adiugée à Dame Madelaine de Roche-choart sa veufue & son heritiere par lesdits Arrests donnez à Tolose les 19. Avril & 10. Septembre 1583.

En l'année 1580. Messire Paul de Foix Sieur de Rabat vendit au Sieur de Cheuerry pere du defendeur la terre de Mont-clar pour la somme de dix mil escus.

Il deceda en la mesme année & delaisa pour son heritiere Dame Madelaine de Roche-choart sa femme, qui par sentence des Requestes du Palais à Tolose fut maintenuë & gardée en la possession & iouissance de tous les biens, dont Paul de Foix son mary estoit mort saisy & vestu.

De ceste sentence appel interiecté par Messire George de Foix mary de la Dame demanderesse, interuint Arrest au Parlement de Tolose, le 19. Avril 1583. par lequel il fut maintenu & gardé en la

A





possession & iouissance de tous & chacuns les biens de la maison de Rabat, & desquels Iean de Foix son Pere estoit maistre & possesseur au temps de son deces: distraiçt d'iceux biens la legitime, telle que de droit, de feu Paul de Foix mary de ladite de Roche-choart, en laquelle legitime, ensemble en tous les autres biens, qui appartiennent audit Paul de Foix par luy acquis, ou d'ailleurs à luy aduenus, & desquels il pouuoit disposer au temps de son decez, ladite de Roche-choart est maintenue.

Tant s'en faut que Messire George de Foix ait oncques eu intention de se pouruoir contre cest Arrest donné à son profit: qu'au contraire il en a luy mesme poursuiuy l'execution en diuerses sortes, contre diuerses personnes. De faict au mesme Parlement de Tolose interuint le 10. Septembre ensuiuant, autre Arrest, ou Messire George de Foix est qualifié demandeur en execution d'Arrest, contre Dame Madelaine de Roche-choart defenderesse; & au Veu est dit, *Veu l'Arrest donné entre les parties le 19. Avril dernier, de l'execution duquel est question.*

Par ce dernier Arrest, ordonné que celluy du 19. Auril prece-dant sera executé: & en ce faisant Messire George de Foix maintenu & gardé en la possession & iouissance de tous & chacuns les biens, qui ont appartenu audit feu Iehan de Foix aussi son pere, que de ses autres predecesseurs, & desquels ledit Iehan estoit maistre & possesseur au temps de son deces, distraiçt de tous lesdits biens la legitime telle que de droit dudit feu Messire Paul de Foix mary de ladite de Roche-choart: En laquelle legitime, ensemble en tous & chacuns ses autres biens, ladite de Roche-choart est maintenüe, cōme par le precedent arrest: & toutesfois condamnée de laisser audit Messire George de Foix la possession vuide & vacüe de la maison terre & seigneurie de Fornets, & les meubles, tiltres & enseignements de la maison de Rabat: & en outre ordonné que pendant l'execution de l'Arrest, & liquidation des droicts appartenans à ladite de Roche-choart, elle jouira par prouision de la maison de Lobenx, & de cinq cents liures de pension.

Ces Arrests ont esté executez, & en consequence de la substitution par iceux declarée ouuerte au profit de Messire George de Foix, il a intenté diuerses poursuites pour le recourement des biens alienez au preiudice de ladite substitution, mesmes contre le Sieur de S. Felix President au Parlement de Tolose pour les terres de la Roque & de l'Espurgue: contre le sieur de Cheuerry pour Montelar, & contre autres: Et neantmoins contre ces Arrests ainsi executez, la Dame de Rabat, vingt & vn an apres, son mary estât decedé, s'est aduisée de se pouruoir par Requête ciuile, pource qu'ils



3

adiugent la legitime de Messire Paul de Foix à ladite Dame Madelaine de Roche-choart sa veufue.

Par Arrest du Conseil prononcé à Lyon le vingt-sixiesme Septembre 1600. la terre de Montclar acquise par le feu sieur de Cheuerry est declarée cōprise en la substitution ouuerte au profit de Messire George de Foix : Cheuerry fils condamné luy en laisser la possession libre & vacuë, avec restitution de fruiçts & despens : & par le mesme Arrest ladicte de Roche-choart condamnée acquitter & garentir Cheuerry de ladite condamnation : en tous ses dommages & interests, & és despēs tant en demandant, que defendant : sauf à elle son actiō al'encontre de Messire George de Foix, pour la legitime de Paul de Foix à elle adiugée par ledit Arrest du 19. Auil 1583. ou distraicte n'auoit esté, & à elle deliurée & imputée : Laquelle legitime dudit Paul de Foix, ensemble ses autres biens sont declarez affectez & hypothequez à Cheuerry, pour la restitution de la somme de dix mil escus & interests d'icelle, & des dommages, interests & despens.

En execution de cest Arrest diuerfes poursuittes du sieur de Cheuerry contre ladite du Roche-choart, luy ayant donné subiet de se resueiller & reprendre l'instance renuoyee à Tolose par Arrest du Conseil du 7. Feburier 1587. entre elle & le feu Sr. de Rabat, pour la liquidation de la legitime a elle adiugée de Messire Paul de Foix, par sentence de l'un des Conseillers de ladite Cour Commissaire à ce deputé en date dudit 10. Ianuier 1601. ladite legitime a esté liquidée a vne once & tiers d'once, c'est à dire, à vn neufiesme des biens de la maison de Rabat, conformement à vne sentence arbitrale, & vn Arrest dudit Parlement de Tolose du 10. Septembre 1573. donné au profit de Messire George de Foix pour la liquidatiō de sa legitime contre Paul de Foix son frere, mary de ladite de Roche-choart.

Neantmoins ayant le feu sieur de Rabat trouué moyen d'accrocher ceste poursuite, & de l'attirer au Conseil, il presente reques-  
te contenant six chefs:

- I. L'un, pour la cassation des procedures faictes à Tolose par Madelaine de Roche-choart.
- II. L'autre, à ce que la legitime de Messire Paul de Foix fut declaree estre seulement vne 192<sup>e</sup>. partie des biens de la maison de Rabat.
- III. A ce que Dame Madelaine de Roche-choart ne puisse pretendre aucun droit en la legitime de Paul de Foix.
- IIII. Que ceste legitime soit liquidée en deniers.
- V. Le cinquiesme regarde les alienations des immeubles pretendus faictes par Messire Paul de Foix.



VI. Et le dernier est à ce que les inuentaires faits apres le decès de Iean de Foix & Dame Catherine de Villemur, soient representez.

Voyant le sieur de Cheuerry que Dame Madelaine de Rochechoart ne tenoit cõpte de se deffendre par vne manifeste collusion & intelligence, qui estoit entre elle & le feu sieur de Rabat, il presente sa requeste pour interuenir, & poursuiure les droits de sa debitrice & condamnée, & conclud à ce que la legitime de Messire Paul de Foix soit liquidée à vne neufiesme partie de tous les biens de la maison de Rabat, conformément à l'Arrest de Tolose de l'an 1573. donné au profit de Messire George de Foix.

Comme la Dame de Rabat void ceste interuention, apres le deces dudit Messire George de Foix son mary, elle obtient lettres en forme de Requeste ciuile contre les Arrests de Tolose des dixneufiesme Aueil & dixiesme Septembre 1583. portans adiudication au profit de ladicte de Rochechoart de la legitime de Messire Paul de Foix son mary : & sur toutes ces instâces sont interuenus plusieurs Arrests interlocutoires, par lesquels auant que proceder au iugement definitif le Conseil a ordonné que la Dame de Rabat presenteroit les procedures faictes au Parlement de Tolose & de Bordeaux sur la liquidation de la legitime de Messire Paul de Foix, ensemble les anciennes dispositions de ceux de la maison de Rabat : à quoy elle n'a point satisfait.

Ce qui s'offre auiourd'huy à iuger entre les parties se resoult en deux principaux points : La Requeste ciuile & la liquidation de la legitime de Messire Paul de Foix. Car quant à la cassation des procedures, rien n'a esté fait à Tolose au preiudice de la iurisdiction du Conseil : au contraire on y a procedé sur la liquidation de ladicte legitime suiuant vn Arrest de renuoy du septiesme Februrier 1587. Le Conseil ayant declaré, qu'il n'y auoit lieu d'euocation à l'esgard de ladicte de Rochechoart : & par ainsi toutes les procedures faictes à Tolose, iusques à l'interdiction, doiuent demourer.

Il conuient doncq traicter en premier lieu de la Requeste ciuile : Car en vain disputerait-on de la quotité de la legitime, si les Arrests de Tolose sont cassez, & s'il n'en appartient point du tout à Dame Madelaine de Rochechoart.

### *Sur la Requeste Ciuille.*

Sera remarqué par le Conseil, si c'est son plaisir, que ceste-cy n'est fondée sur aucun des moyens ordinaires, qui sont ouuerture de restitution contre les Arrests. Car on n'allegue ny dol ou mauuaise foy, ny surprise & precipitation de la partie. Quoy doncq on dit



5

que ces Arrests ont esté dōnez *supernon contestatis*: qu'il n'y auoit eu demande de la legitime que le Parlement de Tolose a adiugée à Madelaine de Roche-choart: & d'ailleurs que depuis on a recouuré quelques pieces, qui estoient és mains du sieur de Saint Felix.

Pour le regard du premier moyen, il est impertinēt, sauf la reuerence du Conseil: Car il se verra par les Arrests que Dame Madelaine de Roche-choart pretendoit tous les biens de la maison de Rabat en vertu du testamēt de son mary: & on ne luy en adiuige seulement, que sa legitime telle que de droit. Par ainsi est il vray de dire que qui a disputé & contesté de l'vniuersité & du tout, à plus forte raison de la partie. *Nampars in toto est. l. si quis cum totum, D. de except. rei indic.* & d'ailleurs quand le deffaut de contestation se rencontreroit au premier Arrest, que non, le mesme ne se pourroit pas dire du dernier, ou Messire George de Foix est notammēt qualifié demandeur en execution d'Arrest.

Et quant aux pieces recouurées du sieur de S. Felix, outre que la Requête ciuile n'a esté obtenüe de quatre ou cinq ans apres, on ne peut dire qu'elles eussent esté recelées & latitées par le dol de ladicte de Roche-choart, lors des Arrests, qui partant n'en peuuent estre retractez, non plus qu'une Transaction sous pretexte de tiltres & enseignements trouuez de nouueau *in l. sub pretextu. C. de Transact. Cum sub prae-textu nouorum instrumentorum lites non debeant inflaurari. C. Inter monasterium. & c. seq. E. de sentent. & re iudic.* Et apres tout, quād ces pieces auroient esté produittes, & veuës, il n'y a rien qui peust empescher l'adiudication de la legitime de Messire Paul de Foix.

Au contraire le defunct sieur de Rabat a luy mesme recogneu qu'il en pouuoit disposer. Recours à l'arrest du Conseil donné cōtre Cheuerry en l'année 1599. Et au surplus il y a vne infinité de fins de non receuoir contre ceste Requête pretendüe ciuile.

*Primò*, en ce qu'elle a esté obtenüe vingt & vn an apres les Arrests, au lieu d'y estre venu dans les six mois.

*secundò*, en ce que le defunct sieur de Rabat a demandé & pouruiuy luy mesme l'execution desdits Arrests: qu'ils ont esté executez en diuerfes sortes, & qu'en execution d'iceux ledit sieur de Rabat a obtenu infinis autres Arrests pour le recouurement des biens alienez au preiudice de la substitution, tant contre le sieur de S. Felix, que le feu sieur de Cheuerry & autres.

*Tertiò* l'Arrest du Conseil du 26. Septembre 1600. confirme lesdits Arrests, ayant reserué l'action à Dame Madelaine de Roche-choart contre Messire George de Foix, pour la legitime de Messire Paul de Foix à elle adiugée par lesdits Arrests des 19 Auil & 30.



Septembre 1583. Qui est declarée affectée & hypotequee au sieur de Cheuerry, pour la restitution de la somme de dix mil escus, intersts d'icelle & despens, dommages & interests, pour l'euction de la terre de Montclar.

Finalement le feu sieur de Rabat tesmoignoît assez n'estre son intention de se pouuoir contre lesdits Arrests, par lesquels la legitime de Messire Paul de Foix est adiugée à sa veufue: puis qu'il auoit présenté Requête, pour la faire liquider à vne 192<sup>e</sup>.

Si lon diët, que le feu sieur de Rabat a poursuiuy l'exécution des Arrests, pour ce qui estoit donné à son profit, par protestation de se pouuoir cōtre le reste, la respōce est prompte, qu'il n'appert point de ceste ptotestation faicte auparauant ladite execution, ny plus de 28. ans apres. Dailleurs l'exécution auroit esté vn acte contraire à la protestation: & puis les Requestes ciuiles ne regardent que les formes des Arrests, qui sont indiuidues, & n'y a point d'apparence de dire que les Arrests valussent au profit du sieur de Rabat, & fussent inutiles pour le reste.

### *Pour la liquidation de la legitime de Messire Paul de Foix.*

La Dame de Rabat pretend faire liquider & reduire ceste legitime à vne 192<sup>e</sup>. des biens de la maison de Rabat, sur ce que par le cōtract de mariage de Iean de Foix & Dame Catherine de Villemur du 4. Nouembre 1509. Corbeyran de Foix pere dudit Iean luy dōne ses biens, avec substitution au premier fils, qui sortiroit dudit mariage, & du premier au second, & apres de l'vn a l'autre: se reseruant seulement l'vsufruiët & la faculté de tester pour la discharge de son ame, & pour doter & appaner ses autres enfans jouxte le droit de Nature.

Que Corbeyran de Foix pere de Iean laissa huiët enfans, de maniere que la legitime de chascun estoit vn seiziesme: & que du mariage dudit Iean estans prouenu quatre enfans, Paul aîné mary de ladite de Roche-choart, George, Gabrielle & Rose, ils ne doibuent prendre leur legitime, que sur la legitime de Iean leur pere, qui seroit la douziesme d'une seiziesme, reuenant à vne 192<sup>e</sup>. & par ainsi que Dame Madelaine de Roche-choart ne peut pretendre que celle portion, pour la legitime de Messire Paul de Foix son mary, la substitution ayant esté declarée ouuerte, & les biens restituez par vertu du fideicommiss a Messire George de Foix.

Contre ces pretentions, qui ne tendent en effect qu'à rendre illu-



soire, & aneantir le recours de garētie reserue pour l'euiction de la terre de Montclar, sur la legitime, dont est question, le sieur de Cheuerry apporte ces responces & moyens, pour monstrier que la dite legitime doit estre vne neuuiesme de tous les biens de la maison de Rabat.

En premier lieu que la legitime des enfans se prend indifferēment sur tous les biens que le pere possede au iour de son deces, soit qu'il soient subiects à substitution, ou non, & chargez de fideicommiss par l'ayeul ou autre ascendants: & la raison en est bōne, d'autant que l'ayeul substituant ou donnant à ses nepueux, *Id videtur facere intuitu filij sui, patris eorum. Mens spectanda est dantis beneficium, cui datum voluit. Nam si in patris honorem hoc fecit, pater accepit beneficium non filius.* Par ainsi posé que Paul & George de Foix fussent expressement appelez par Corbeyran leur ayeul mariant ledit Iean de Foix: neantmoins les biens leur estant donnez *cōtemplatione* dudit Iean leur pere, c'est autant comme s'ils les eussent prins, & receu immediatement dudit Iean, encores qu'en effect ils vinsent de leur ayeul, par les raisons, qui se peuuent tirer *ex l. profectitia. D. de in. dot. l. & si plures. §. in arrogato. De vulg. & pup. l. Dedit dotem. D. de collat. l. ut liberis. C. eo. Alciat. de presumpt. reg. 1. Presumpt. 17. Menoch. consil. 183. lib. 2.*

Et vn autre argument pour monstrier que la legitime des enfans se porte & se prend sur les biens substituez, c'est que mesme l'alienation en est permise pour marier & doter les filles. *Auth. Res que. C. Com. De leg. l. Mulier. D. Ad Trebell.* estant considerable que l'Ayeul ne peut par aucune substitution priuer ses descendants du droit de legitime, voire qu'il est tenu de doter ses Niepces. *l. capite D. De Rit. Nupt. l. Auis & ibi gl. D. De Pact.*

Doncq' puisque Paul de Foix estoit substitué *intuitu patris*, les biens subiects à substitution doibuent estre censez comme patrimoine dudit Iean son pere: & partant sur iceux indifferēment, cōme sur les autres, qu'il pouuoit auoir d'ailleurs, doit estre prinse la legitime des enfans. C'est l'opiniō de Fernand sur la loy *In quartam. D. Ad Leg. Falcid. fol. 74.* Et ainsi se Iuge constamment au Parlement de Tolose, dont le sieur de Cheuerry, outre l'Arrest de Lacam rapporté par Charondas en ses responces, a produit vne sentence du seneschal de Tolose confirmée par Arrest formellement decisiu de ceste question donnée au profit du feu sieur de la Bastide gouuerneur des ponts de Sé & d'un sien pūisné, contre leur frere aisné.

Dauantage, & voicy qui tranche toute la dispute, Apres le deces de Iehan de Foix, Messire George de Foix mary de la Dame demā-



deresse par sentence arbitrale confirmée par Arrest du 12. Septembre 1573. fait liquider & definir sa legitime estre vne once & tiers d'once, qui reuiet à vne neufiesme de tous les biens de la maison de Rabat, comme n'ayant ledit Iehan de Foix leur pere delaisné que trois enfans Paul, George, & Gabrielle, Rose estoit decedée auparavant: & *Quatuor aut infranatis dant iura trientem*, qui par apres subdiuisé en trois, donnoit à chascun pour sa legitime vne once & vn tiers d'once.

Pourquoy donc reduira t'on la legitime de Paul aîné de la maison à vne 192<sup>e</sup>. partie des biens, celle de son Capdet ayant esté liquidée à vne neufiesme? De deux freres enfans de mesme pere, la legitime doit estre esgale. *Idem ius, eadem petendi conditio, eadem conditio personarum; & quæ sunt eadem uni tertio, debent eadem esse inter se.*

Il y a plus, c'est que Messire George de Foix ne se contentant pas d'une Neufiesme, auoit obtenu requeste ciuile contre l'arrest de Tolose, & euocation au Parlement de Bordeaux, ou il faut que de deux choses l'une soit aduenue: ou bien que l'Arrest liquidant ladite legitime à vne neufiesme, ait esté confirmé, ou bien la Requeste ciuile enterinée, qui eut esté vn preparatoire pour adiuger plus ample legitime.

Après vn si long temps venir rechercher les motifs des Arrests, ce ne seroit iamais fait: Mais neantmoins on pourroit dire que ceste liquidation de legitime est fondée sur ce que Messire Iean de Foix auoit acquitté des legitimes anciennes deuës par son pere, & par les biens de la maison: comme il se void par vn Arrest de l'an 1517. & d'ailleurs payé les legitimes de sept autres ses freres; de maniere qu'avec la sienne, c'estoit la moitié des biens, qui luy appartenoient de son chef: outre la Quarte Trebellianique qu'il en pouuoit distraire: & que par son industrie, il les auoit grandement amplifiez: ioint qu'il appert par le Contract de mariage de Iean de l'an 1509. l'intention de Corbeyran auteur de la substitution auoit esté que le fils aîné de Iean son fils estant heritier, les autres puisnez fussent appanez & dotez selon la faculté des biens de la maison de Rabat & de la Roque. *Lon premier filh naissent dudit mariatge habil heretere & succedera en tous les beŷ & causes dudit Iean de Foix &c. Et los autres filhs ou filhes seran adotez selon la facultat de la maison de Rabat & de la Roque*, ce sont les propres termes du contract, qui donnent clerement à entendre que Corbeyran a voulu que ses nepueux prinssent leurs legitimes sur tous les biens de la maison de Rabat.

Or si l'intention de la Dame demanderesse auoit lieu, & que la



legitime des enfans se deubst seulement prendre sur la legitime de leur pere, les enfans ne seroient pas dotez & appanez selon la faculté des biens de la maison de Rabat & de la Roque: Au contraire c'eust esté de pauvres Capdets de douze à quinze cens liures de legitime, posé que les biens de la maison de Rabat valussent vn million de liures. Car il se pouuoit faire que Iean de Foix laissast huit, dix, douze enfans ou plus: & la portion de chascun eut esté bien petite si on l'eust prinse sur sa legitime seulement.

Pour faire fin on pourroit encore adiouster que Messire George de Foix n'a point recueilly la substitution par vertu du contract de mariage de Iean son pere, pour ce quelle estoit finie & caduque en la personne de Paul, mais par le contract de mariage dudit Paul de l'an 1554. Ioint les difficultez & impossibilitez, qu'il y auroit aux ventilations & disquisitions de ce que chascun de ceux par les mains de qui la substitution seroit passée, auroient adiousté aux biens substitués, s'il falloit seulement prendre la legitime des descendants sur la legitime de leur pere.

On ne parle point des substitutions portées par le testament de Corbeyran: pour ce que *Post perfectam donationem, non potuit conditionem adicere: & donatarium inter vivos fideicommissum gravare.*

Il y a plusieurs autres demandes faictes par le sieur de Cheuerry pour son recours de garentie, dont la decision dépend de la liquidation de la legitime adiugée a ladite de Roche-choart: & en somme il est contraint d'espelucher & rechercher les droits qui ont appartenu a Messire Paul de Foix son debteur, son heritiere ne tenant compte de les poursuiure par vne manifeste collusion, qui est entre elle & la Dame de Rabat. Entre autres il a demandé le tiers de la Dot de Dame Katherine de Villemur: On luy obiecte que Paul ayant succédé à Iean son pere *confusione extinctum fuit debitum*: mais il respond qu'apres la restitution de l'heredité, Messire Paul de Foix, quoy que soit son creancier, qui le represente, rentre en ses droits & actions, qu'il auoit sur icelle, *iuxt. l. Debitor. Ad Trebell. & Decision. 137. Matth. de Afflict.*



MONSIEUR.



